

BOTA BERTSOA!




ZENTZUMENAK

UXUE ALBERDI

DOINUA: TRENEKO KOPLAK

1





Egunsenti gorria,
ibai gardena,
liburuak, margoak
eta zinema:
ai, ikusmena!
mundurako leihoa, begiarena.

2

Orroaka trumoia,
txistuka trena,
suhiltzaile-kamioi
baten sirena:
ai, entzumena!
mundurako atea, belarriena.

3

Amaren izerdia,
aitaren krema,
puzker bat izaretan
lokartu dena:
ai, usaimena!
mundurako bidea, sudurrarena.



BOTA BERTSOA!



4

Pastelaren erdia,
limoi laurdena,
neguan arrain-zopa,
amamarena:
ai, dastamena!
mundurako zubia, ahoarena.



5

Luma baten laztana,
zizta!, eztena,
kilima bat lepora
heltzen ez dena:
ai, ukimena!
mundurako txirrista, azalarena.



6

Egunsenti gorria,
txistuka trena,
amaren izerdia,
limoi laurdena,
zizta!, eztena,
mundua ez al da bost zentzumenena?

